

որ է մօտ ի բերդն, իջևանեցաւ և զօրքն ըստ մեծի մասին ցրուեցան և ինքն հրաման հանեալ զամենայն երկիրն ժողովել ետ ի բերդն, և ի պարիսպ սրբոյ Աթոռոյս և յայլ ամրոցս: Իսկ նոքա մտեալ յերկիրս և զՇարուր հնազանդեցուցեալ ինքեանց՝ զառաջիկայ գիւղորայսն հրակիզելով յետ երից ատուրց հասին առ սա. և սա սակաւ զօրօքն անխոհեմաբար մարտուցեալ, պարտեցան և մտին ի բերդն, իսկ հետամուտ եղեալ զօրաց նոցա հասեալ էին մինչ ի դուռն բերդին և ի մէյտանն և յայնմ տեղոջ դարձեալ սոցա զբազումս ի նոցանէ կոտորեալ էին. և միւսքն զաւարս ինչ արարեալ ի մօտոյ բերդին դարձան անտի և ի նորագաւիթ գիւղն բանակեցան: Յետ Բ (2) ատուրց պատերազմին՝ Զաֆարղուզի բէկն թուղթ էր գրեալ մեզ և քանի մարդկամբ իւրով յղեալ առ մեզ, միտքն այս թէ՛՝ Երևանու խանն տղայութիւն առնելով զբարեկամութիւն մեր քակեաց և յանկարծ եկն ի վերայ մեր և վնաս հասոյց և զիս առեալ երեր. և զկնի դարձման մերոյ վերստին ևս զօր ժողովեալ գայր ի վերայ մեր, ուստի և մեզ հարկ եղև զալ և ի գալս մեր ևս՝ ոչ մարդ յղեաց ընդ առաջ և ոչ շնորհ ինչ եցոյց. այլ պատերազմեցաւ ընդ մեզ, և այսպէս եղև:

Բայց դու միամիտ լեր, որ մեք առ ձեզ բարեկամութիւն ունիմք, և զօրաց մերոց պատուիրեալ եմք ոչ ինչ վնաս առնել ձեզ: Ձեր մարդն գայ և գնայ. և խանին խրատ գրեա, մի առնել այսպէս, և այլն: Իսկ մինչ թուղթն և մարդիկն եկին, ի նոյն գիշերին մեր խելացի խանն ևս թուղթ էր գրեալ, թէ մեք կոտեցաք և մտաք ի բերդն, և պատրաստութիւն տեսանեմք զօրք բերելոյ. մի գուցէ հաղորդութիւն ինչ առնիցէք ընդ նոսա և կերլի ինչ տայցէք, զի ի խոր խոցելոց եմք ի ձէնջ. այլ թէ գայցեն, հարէք և ի բաց վարեցէք և այլն: Ուստի և մեք ոչ կարացաք ի մէնջ մարդ յղել և կամ զընծայ առ Զաֆարղուզին. այլ գեկեալսն ի նմանէ շահեալ և շնորհակալութեան թուղթ գրեալ վերադարձուցաք: Յետ քանեաց ատուրց մեծ եղբայրն նորա՝ Հիւսէին խանն Խօյայ, ևս եկն ի բանակն: Եւ սոքա քանիցս մարդ յղեալ առ Վիրսն, աստ ևս ձայն հռչակեցին, թէ զօրք գան ի վրաց. և նոքա իբրու է (7) օր կացեալ անդ առ բերդին, ապա՝ թէ յերկիւղէ վրացն և թէ ի սովուն զոր կրէին, ի յօգոստոսի ԻԹ (29) ելին անտի, և զՓարաբար գիւղն և զայլս ևս հրակիզեալ, յանկարծ յայս կողմն դիմեցին, զոր ոչ կարծէաք, թէ ընդ այսր անցանեն. և տաճիկ դէտքն մեր ևս յայգիսն մտեալ գոլով՝ անագան հասին աստ զգացուցանել մինչ զի ի հասանիլ նոցա աստ, զօրաց գունդքն ևս երեւեցան: Յայնժամ իւրաքանչիւրքն ջանացին զնախիրս իրեանց ժողովել, մերայինքն ևս զոմանս ածին ի պարիսպս, բայց գութանի տաւարն՝ եզն և գոմէշ և մողոց նախիրն և գիւղիս մերոյ նախիրն մնացին արտաքոյ՝ զորս ոչ ժամանեցին ածել ի ներս, և յառաջոյ եկեալ արամանչիքն յարձակեալ ասպատակեցին զայնս և մտեալ ի յերիս վանորայսն զնոցա տաւարն ևս, նաև զամենայն ինչ զորս տեսին՝ յափշտակեցին: Եւ ի յանդաստանսն գերեք անձինս գտեալ ի գեղջէս մերմէ, կալամ զնոսա ևս:

Ձեռ որոց՝ խաներն բազմութեամբ զօրացն եկին հանդարտութեամբ, և անցեալ ընդ հարաւային կողմամբն սրբոյ Գայխանեայ վանիցն և հասեալ յեզր գետոյն մերձ ի ջրաղացն մեր՝ իջին անդ և վրանս հարին. և ի ճանապարհին տեսեալ, թէ ոչ գոյ ընդ առաջ գնացող, մարդիկ յղեցին առ մեզ յորդորել զմեզ գնալ ի տես ինքեանց: Իսկ մեք պատասխանեցաք, թէ աստ պահապանք կան յիշխողէն մերմէ և պարսպի իշխանութիւնն այսօր առ նոսա է. մեք ոչ կարեմք գնալ և այլն: Իսկ զերիս թուղթս գրեցաք առ Հիւսէին խանն և առ եղբայրն Զաֆարղուզին և առ Քեալպալի խանն և ի ձեռն Խաչատուր և Ներսէս վարդա-